

改良

# 專件

日本留學生陳憲鏞等上衍聖公書

夙仰芝儀時傾葵慕春風久被化雨欣沾生等翹首闕里無時不念切迫隨者也今生等辱承選派赴東游學自春徂冬已逾兩學期之久論學問之間毫無心得惟領受之餘凡一講一義要皆爲我中國迫不及待之事兼之報紙雜誌創言立論其鯨吞蠶食之志日甚一日即稍有人心者得不聞之而神傷耶生等少讀詩書其於天地君親師之大義夙夜凜凜未敢或忘卽今日之世界度內地之情形不得爲吾山東憂且懼也夫山東當南北之咽喉較諸他省爲尤險自朝廷下詔變法以來南數省出洋游學者官費私費絡繹不絕而我山東自周郁帥蒞任後始派生等五十餘人來學至今南洋諸省官費而外其自費東來者每月不乏其人獨山東寂寂無聞焉其風氣之閉塞亦可想見矣要知風氣閉塞尙無慮也最可患者德人佔據膠島實爲我山東心腹之害况今鐵路已達濟南今日議設官明日索街道種種要挾禍機已見一旦有事誰能阻之斯時也山東危吾道亦因之而危矣嗚呼殆哉傳云非我族類其心必異自天主耶蘇兩教傳於中土而無知之民被其煽惑者概有其數於天主耶蘇教內多一倍信奉之人卽於我孔教上加一倍抵牾之力如不早施教育以禦將來恐有難於我兩立之勢何也山東各處教堂林立卽吾夫子切近者言之兗郡雖云魯地而德國教堂聳峙已駭人耳目近來德人氣勢益張膠島本係租界公然而改呼爲膠京其居心之叵測不待智者而已知之矣使其野心一熾山東有危又豈肯容闕里爲乾淨土乎此其事在吾夫子當亦慮及之耳生等身居海外心懸宗國念桑梓之急迫望杏壇而神馳覺聖教之廢興實賴於山東而山東之得失更有關乎聖教欲振興山東宜急講教育欲講教育當先保聖教欲保全聖教不得不謀之夫子

夫子延尼山之譜系爲聖教之根源振興教育實吾夫子當盡之義務不容辭之責任况當國家舉辦學校振興教育之始吾夫子果能不憚艱辛獨任其事上可以答聖朝崇遇之隆下可以慰聖祖在天之靈千載一時弗可或失生等情屬鄉誼禮備弟子用敢剴切陳詞冒昧直請望夫子原鑒而垂聽焉一出洋觀察時局之宜急也今日學界與昔大異我國何以衰彼國何以盛觀其政治法律兵制經濟及夫聲光化電各有專門學校我夫子具先覺卓識自能窺其蘊奧回國爲我中土人士快指迷津則全國人民無不拜夫子之賜也况駕臨東京清國留學生有一千餘人無不以歡迎爲幸且日本國王待以上賓之禮拜謁至聖先師廟當更遣文部大臣陪禮則知日本尊聖道者至矣我夫子而果於此也非獨爲邦家之光亦生等之榮也况我夫子爲文教之宗正當詳究得失振興教育以立山東生存之基礎一東魯開辦學校之爲要也山東鐵路礦產一切權利已被德人侵奪全省命脈在其掌握但幸尙未我奪者教育之權耳周郁帥熱心時局救我山東特派生等東渡速成師範以爲後日回國講求教育之地我夫子亦宜在杏壇之側設一講壇並認真整頓學校爲聖教振根本聖教興山東亦存我夫子爲聖教計爲聖賢桑梓計且爲四千萬人之性命土地計斯任大責重微夫子其孰能當之哉尤奉懇者生等鄙見所及知中國教育不講求國民資格不能有進步人心不合群國家根本不足圖富強生等現在東京業已邀集同人創立山東同鄉會專爲交換智識考求學問起見意欲卒業回國後稟明撫帥暨學務處在省垣設立教育講習社一所凡學界之人皆可入公所討論教育之法以期山東學界擴張近來調查京師濟南保定以及生等共五百餘人若得夫子出而提倡則學界之影響更覺其大望我夫子注意格外生等三月來華定卽邀同社友來曲拜謁恭請命區區微忱特此奉聞倘蒙惠然曷勝欣感臨楮不勝翹企之至

## 敬伸謝悃

近承歷城縣署刑席陳午岡君捐送醫院施藥費庫銀二十兩足徵利濟爲懷實堪欽佩

登報告用誌拜嘉

總醫院白